

Visoki predstavnik objavio odluku u vezi Projekta CIPS

Visoki predstavnik Paddy Ashdown je danas objavio Odluku kojom utvrđuje strukturu cijene lične karte u BiH. Odlukom visokog predstavnika zadržava se postojeća struktura cijene (osnovna cijena izdavanja svake lične karte: 10 KM; dodatni administrativni troškovi: 3,5 KM, bankarske usluge: 1KM). Ovim krajnja cijena koju građani plaćaju za izdavanje lične karte ostaje 14,5 KM.

Visoki predstavnik je reagirao na odluku Vijeća ministara BiH donesenu u četvrtak koja je prijetila ekonomskoj održivosti projekta CIPS i sposobnosti BiH da ispuni svoje ugovorne obaveze.

Osvrnuvši se na opstrukcionizam u RS prema ovom projektu visoki predstavnik je izjavio: "Ovakve radnje podrivaju povjerenje javnosti u jedinstvenu bh. ličnu kartu i time ugrožavaju budućnost svih građana ove zemlje. Jedini način da se to spriječi je da se okonča nesigurnost koja u ovom trenutku postoji u vezi sa projektom."

Visoki predstavnik je rekao da je spor napredak u izdavanju jedinstvene bh. lične karte bio uzrok duboke zabrinutosti. "Nije pretjerivanje reći da se ovaj projekat, tako značajan za budućnost BiH, nalazi u velikoj krizi", rekao je. "Dopustite mi da naglasim šta se sve nalazi u opasnosti. Lična karta je jedan od najvažnijih projekata u ovoj zemlji od vremena Dayton. Ovaj projekat je od suštinskog značaja za proces jačanja vladavine zakona u zemlji. Od suštinskog značaja je za borbu protiv kriminala, protiv prijevara u javnim službama, za penzije, prava ratnih vojnih invalida, borbu protiv terorizma. Od suštinskog značaja je za učvršćivanje granica BiH i jačanje Državne granične službe. On je od ključnog značaja za efikasno uvođenje PDV-a i borbu protiv carinskih prijevara. Iz svih

ovih razloga ovaj proces predstavlja osnovni preduvjet da bi građani BiH mogli putovati bez viza, kao i za moguće članstvo BiH u Evropskoj uniji.”

Visoki predstavnik je pozvao vlasti BiH da osiguraju uspjeh CIPS projekta.